

醫述卷九 雜證匯參

新安杏軒程文囿觀泉輯

姪 光庭鑑亭校
光庠養和

痢

經義

帝曰。腸澼便血何如。岐伯曰。身熱則死。寒則生。帝曰。腸澼下白沫何如。岐伯曰。脈沉則生。浮則死。帝曰。腸澼下膿血何如。岐伯曰。脈懸絕則死。滑大則生。帝曰。身不熱。脈不懸絕何如。岐伯曰。滑大者生。懸濇者死。以藏期之。○脾脈。外鼓沉爲腸澼。久自己。肝脈。小緩爲腸澼。易治。



醫述卷九

雜證匯參目錄

痢

瀉附腸鳴

大便

小便

遺精

淋濁

陽痿

疝

脫肛



醫述卷九 雜證匯參

新安杏軒程文囿觀泉輯

姪

光庭鑑亭
光庠養和校

痢

經義

帝曰。腸澼便血何如。岐伯曰。身熱則死。寒則生。帝曰。腸澼下白沫何如。岐伯曰。脈沉則生。浮則死。帝曰。腸澼下膿血何如。岐伯曰。脈懸絕則死。滑大則生。帝曰。身不熱。脈不懸絕何如。岐伯曰。滑大者生。懸濇者死。以藏期之。○脾脈。外鼓沉爲腸澼。久自己。肝脈。小緩爲腸澼。易治。



北京中醫藥大學圖書館版權所有

腎脈。小搏沉爲腸澼下血。血溫身熱者死。○心肝澼亦下血。二藏同病者可治。其脈小沉澇爲腸澼。其身熱者死。○陰陽虛。腸澼死。○腎移熱於脾。傳爲虛。腸澼死。素問

哲言

痢有赤痢。白痢。赤白痢。水穀痢。膿血痢。噤口痢。休息痢。風痢。寒痢。熱痢。溼痢。氣痢。虛痢。滑痢。積痢。久痢。疫痢。蟲疰痢。五色痢。東醫寶鑑

按滯下之證。古人多與洩瀉同論。至三因方始另立條目。夫病有從外感而得者。須分六氣之異。外旣受傷。腸胃鬱結。隨其寒熱溫涼以調之。有因藏氣發動。干犯腸

胃而得者。須察其何藏相兼。以平治之。又有因飲食失節而得者。則審其何物所傷。以消尅之。但病有虛實。治有先後。若病氣暴至。元氣壯實。積滯膠固者。宜下之。病久氣脫。腸胃虛滑者。宜溫之。瀉之。大抵可溫則溫。可下則下。或解表。或利小便。分別在裏在表。挾風挾熱挾寒等證。膿血赤白。有氣病血病之分。後重裏急。有氣血虛實之異。不可不察。劉宗厚

下痢治法。在表者汗之。在裏者下之。在上者涌之。在下者竭之。身表熱者疏之。小便瀉者利之。盛者和之去之。過者止之。張潔古

凡治痢。和血勿傷血。調氣勿破氣。仁齋直指



後重宜下。腹痛宜和。身重宜除溼。脈弦宜去風。風邪內結宜汗。身冷自汗宜溫。膿血稠粘宜重劑以竭之。劉河間河間發明滯下證治。尤爲切要。和血則便膿自愈。調氣則後重自除。二語實盲者之日月。聾者之雷霆也。○或問河間之言滯下。似無挾虛挾寒者乎。曰。洩利之病。水穀或化或不化。並無裏急後重形狀。若滯下則不然。或膿。或血。或腸垢。或無糟粕相混。雖有痛不痛之異。然皆裏急後重。逼迫惱人。皆實熱證也。近年涉歷。亦有虛寒證者。如治予從叔婁長官等。皆用參朮乾薑之類是也。

朱丹溪

河間曰。夫治諸痢者。莫若以辛苦寒藥。苦能燥溼。寒能

勝熱。使氣宣平而已。此說相傳至今。凡治痢者。悉用寒涼。皆此說之誤也。毋論其他。姑以苦能燥溼一言辨之。見大左矣。夫五味之理。悉出內經。有曰以苦燥之者。蓋言苦之燥者也。河間不察。便謂是苦皆燥。不知內經之言苦者。其性有二。其用有六。如曰火生苦。曰其類火。其味苦。曰少陽在泉爲苦化。少陰在泉爲苦化。曰溼淫於內。治以苦熱。燥淫於內。治以苦溫。是皆言苦之陽也。曰酸苦涌泄爲陰。曰溼司於地。熱反勝之。治以苦冷。曰溼化於天。熱反勝之。治以苦寒。是皆言苦之陰也。此其言性之二也。又曰以苦發之。以苦燥之。以苦溫之。以苦堅之。以苦泄之。以苦下之。此其言用之六也。蓋苦之發者。

麻黃白芷升柴之屬是也。苦之燥者。蒼朮白朮木香補
骨脂之屬是也。苦之溫者。附子乾薑肉桂吳萸之屬是
也。苦之堅者。續斷地榆訶子之屬是也。苦之泄者。梔柏
芩連木通膽草之屬是也。苦之下者。大黃芒硝之屬是
也。夫氣化之道。惟陽則燥。惟陰則溼。豈以沉陰下降如
黃連黃柏之屬。以至苦大寒之性。而猶謂其能燥。有是
理乎。是但知苦燥之一言。而不察苦發苦溫苦堅苦泄
苦下之五者。何也。因致後人治痢。多不分寒熱虛實。動
以河間之法。及其將危。猶云血色如此。何敢用溫。腹痛
如此。何敢用補。死而無悟。深可哀也。景岳全書

凡治痢疾。一見表證。必先解表。若表不解。則邪將傳裏。

難愈。故發熱身疼。邪在太陽。參蘇飲。寒熱往來。邪在少陽。小柴胡。身熱目痛鼻乾不眠。邪在陽明。葛根湯。必表邪解而後無傳變之患。查了吾

內經冬月傷寒。已稱病熱。至夏秋。熱暑溼三氣交蒸。互結之熱。十倍於冬月矣。外感三氣之熱而成下痢。必從汗先解其外。後調其內。首用辛涼以解表。次用苦寒以清裏。失於表者。外邪但從裏出。不死不休。故雖百日之遠。仍用逆流挽舟之法。引其邪而出之於外。則死證可活。危證可安詳。金匱有云。下痢脈反弦。發熱身汗者自愈。夫久痢之脈。深入陰分。沉瀆微弱矣。忽然而轉弦脈。渾是少陽生發之氣。非用逆挽。何以得此。久痢邪入於



陰身必不熱。今因逆挽之勢。逼其暫時燥熱。頃之邪從表出。熱自無矣。久痢陽氣下陷。皮膚乾澀。斷然無汗。今以逆挽之法。衛外之陽。領邪氣同還於表。而身有汗。是以腹中安靜。而其病自愈也。又有驟受暑溼之毒。水穀傾囊而出。一晝夜七八十行。大渴引水自救。此則腸胃爲熱毒所攻。頃刻腐爛。更用逆挽之法。迂矣遠矣。每從內經通因通用之法。大黃黃連甘草。一晝夜連進三五十杯。俟其利渴之勢少緩。乃始平調於內。更不必挽之於外。蓋其邪如決水轉石。乘勢出盡。無可挽耳。更有急開支河一法。其邪熱之在裏者。奔迫於大腸。必鬱結於膀胱。膀胱熱結。則氣不化而小溲短赤。不用順導。而用

逆挽。仍非計也。清膀胱之熱。令氣化行而分消熱勢。則甚捷也。仲景謂下利氣者。當利其小便。非急開支河之謂乎。然而水出高源。肺不熱則小溲自行。肺與大腸爲表裏。大腸之熱。皆因肺熱所移。尤宜先清肺之化源。金匱有下利肺痛者。紫參湯主之。氣利。訶黎勒散主之。後人疑非仲景之方。詎知腸胃有病。其所關全在於肺。又可見肺氣不通而痛。則急通其壅。大腸之氣墜而逼迫。而緩調其適矣。○再按治瘧之法。當從少陽而進退其間。乃痢疾之表。亦當從少陽半表之法。緩緩逆挽其下陷之清氣。俾身中行春夏之令。不致於收降耳。究竟亦是和法。全非發汗之意。津液未傷者。汗出無妨。津液既



傷。皮間微微得潤。其下陷之氣已舉矣。夫豈太陽外感風寒。可正發汗之比乎。又豈太陽陽明合病下利。可用葛根之比乎。噫。微矣。喻嘉言

痢證古名滯下。夏秋暑溼挾積者居多。其次則風淫火迫。寒侵燥氣。獨不爲患。至於暑有陰陽。必兼乎溼。夫陰暑由於人之陽氣先虧。加以貪涼喜冷。鬱折生陽。故主於溫。陽暑由於天之熱伏。阻氣化濁。則重於清。但邪之來也。似水之流。臟腑間一有罅隙。則乘虛而着。故有在氣在血之分。傷臟傷腑之異。若表之邪鬱。而氣機下流不息者。喻氏論人參敗毒散。裏之積壅而寒熱交粘者。潔古立芍藥湯。在氣分。有苦辛調氣與辛甘益氣等法。

在血分。有酸苦行血及鹹柔養血諸方。若表證急。從乎三陽。有桂枝湯。葛根芩連湯。小柴胡湯。裏勢實。專究脾胃。有小承氣湯。溫脾湯。總之治腑以三焦見證爲憑。治臟以足三陰爲要領。辨其虛實之情。酌以通瀉之法。是證最難愈者。莫如休息痢。攻補之法非一。最危險者。莫如噤口痢。卻有兩端。若因暑溼邪充。格拒三焦者。氣機皆逆傳而閉。上下之勢。渾如兩截。治不得其要。則邪無出路。正立消亡。丹溪立法最高。後世都宗其旨。先生又借用半夏瀉心湯減去守中之品。取補以運之。辛以開之。苦以降之。又因脾腎之陽素虛。陰邪從中而下者。先傷太陰。繼傷少陰。關闡大開。痛泄無度。戊癸少化火之



機。命陽無蒸變之力。此不饑不食。爲嘔爲脹。理宜然矣。與邪多積熱之候不同。參之仲景理中湯。腎氣丸。及景岳理陰煎。胃關煎等法。又以大劑茯苓配入參歸薑附桂製白芍之類。較地黄阿膠尤勝。與之腸膏竭盡。絡脈結滯而痛者。堪稱神品。○古賢治痢。不外通滯二法。言都新痢宜通。久痢宜滯。○滯下之滯字。非停滯飲食。言暑溼內侵腑中。流行阻遏而爲滯耳。臨證指南

王損菴以種種痢疾。總由溼熱入胃。此一句便可悟病形矣。痢疾腹痛。必是繞臍以下。當小腸之分野。小腸無毒。則糟粕得循其正。雖曲而順下無礙。惟膿血則不得循其正而不肯下。故痛也。小便不利者。小腸爲毒邪所

迫。不能分利。故短縮也。噤口者。乃毒氣原盛。或破藥太過。挾傷上中二脘宗氣。毒邪乘虛而上逆也。己任編

治痢大法。始當推蕩。久當溫補。而尤宜以顧胃氣爲主。蓋百病以胃氣爲本。而於痢爲尤要。故能食者輕。不能食者重。絕不食者死。是痢之賴於胃氣者。如此其重矣。○瀉與痢。不分兩證。混言溼熱而利小便。非也。蓋淡滲功能利水。濁流得快。則瀉自止。若痢疾乃垢穢之物。因於溼熱。腸胃怫鬱而成。出於大腸傳送之道。故不宜過用滲利之藥。重竭其陽而涸其津液。是病降之而藥又降之也。○凡治滯下與滑泄不同。滑泄有可濇之道。故古人有用粟殼訶子以止其滑。若滯下。本屬溼熱濇滯。



法宜疏利。最忌兜瀉。大腸爲肺之腑。大腸既有溼熱留滯。則肺家亦必有鬱滯不清。古人用藥。每利肺氣。知其性喜通利。清臟以及腑也。倘誤用兜瀉。則溼熱無所宣洩。肺氣不得下行。非惟痢疾增劇。且恐溼熱熏蒸。上干乎肺。則脹滿氣逆不眠惡食諸證至矣。馮氏錦囊

古人治痢。多用墜下之品。所謂通因通用。法非不善。然效者半。不效者半。其不效者。每至纏綿難愈。或嘔逆不食而成敗證。仔細揣摩。偶見燭光。恍然有得。因思火性炎上。何以降於腸間而爲痢。良由積熱在中。或爲風寒所閉。生冷所遏。致火氣不得舒伸。逼迫於下。醫者更用下墜之藥。則降者愈降。而痢愈甚矣。因製治痢散以治

痢證初起。方用葛根爲君。鼓舞胃氣上行。陳茶苦參爲臣。清溼熱也。麥芽山楂爲佐。消宿滯也。赤芍廣皮爲使。所謂行血則便膿自愈。調氣則後重自除也。惟於腹中脹滿拒按者。此有宿食。更佐以朴黃丸下之。若日久脾虛。食少痢多者。五味異功散加白芍香連清而補之。若氣虛下陷者。補中益氣湯升提之。若邪熱穢氣塞于胃脘。嘔逆不食者。開噤散啓之。若久痢變爲虛寒。肢冷脈微。飲食不消者。附子理中湯加肉桂溫之。程鍾齡

痢之爲證。多本脾腎。脾司倉廩。土爲萬物之母。腎主蟄藏。水爲萬物之原。二藏皆根本之地。投治少差。冤沉幽冥。究其疵誤。皆寒熱未明。虛實不辨也。晚近不足論。卽

